



Plan da finanzas 2010 - 2014

M E S S A D I

dalla suprastonza communal a al cussegl da vischnaunca

Preziau signur president
Preziadas signuras cusseglieras
Prezias signurs cussegliers

Il 19 da zercladur 2009 ha il cussegl da vischnaunca approbau unanimamein il program d'activad 2009 - 2012. Quel cuntegn las visiuns ed intenziuns, che duein vegnir realisadas els proxims quater onns. Las autoridas communalas vulan dar nova tempra a Mustér sco center regional sisum la Surselva. El medem mument duei la collaboraziun regionala vegnir intensivada. Plinavon duei la restructuraziun vegnir cuntinuada e las structures adattadas allas directivas dalla nova constituziun communal. Ultra da quei vegn ins ad instradar novas activitads economicas e cuntinuar cun la sanaziun finanziaria. In impurtont instrument leutier ei la nova planisaziun locala.

In tema d'emprema prioritad ei la Casa da tgira Sursassiala. Las decisiuns ston succeder el proxim temps, sch'ins vul buca riscar da spiarder considerablas contribuziuns cantunalas per la regiun da Sursassiala. Suenter grondas stentas se presenta ussa ina sligiazion da cumpromiss. Tutta atenziun dat la suprastanza communal era alla scolaziun. Per saver ademplier quei pensum drova ei denton refuormas e collaboraziuns, denter auter cun la scola claustrala.

Numerusas vias communalas e canalizaziuns basegnan ina sanaziun. El program d'activitad ein las differentas necessitads numnadas e classificadas. Sco gia constatau tier la deliberaziun parlamentara da quella fatschenta, eis ei nunpusseivel d'ademplier tuts giavischs. Per quei sto la realisaziun s'adattar allas pusseivladads finanzialas. Per contonscher quella finamira havein nus eligiù iigl instrument da fixar ina summa globala per quellas spartas. La realisaziun dils singuls projects sto s'adattar a quella limita.

Il cussegl da vischnaunca ha approbau unanimein il program d'activitad per ils proxims quater onns. Quel fuorma la basa per elaborar il plan da finanzas. A vesta da quella detagliada documentaziun, desista la suprastanza communal da grondas declaraziuns supplementaras e serefescha sil messadi nr. 6-2009/2012.

Tenor il sistem secumprovau cumpeglia il plan da finanzas mintgamai tschun onns. Quei principi lein nus era respectar vinavon, aschia ch'il plan cumpeglia ils onns 2010 – 2014.

Ferton ch'il program d'activitad informescha davart las lavurs ed ils projects realisai ni previ pils proxims onns, cuntegn il plan da finanzas ina survesta a pli liung temps sur dalla situaziun finanziaria e las investiziuns previdas.

La basa per il plan da finanzas ein las cefras effectivas dil quen 2008. La calculaziun dil quen da menaschi pils onns 2010 entochen 2014 ei succedida cun agid d'in program electronic. Il plan da finanzas ei vegnius preparaus minuziusamein dalla suprastanza communal e silsuenther repassaus ensemen cun la cumissiun da gestiun. *Unanimamein recamondan els al cussegl da vischnaunca da prender enconuschientscha dil plan da finanzas per ils onns 2010 – 2014.*

Sco usitau survargava l'emprema versiun dil program d'investiziun las pusseivladads finanzialas. Per mantener iigl equiliber finanziel ed evitar in carschament considerabel dils deivets eis ei stau necessari da reducir las investituziuns giavischadas per ina roscha milliuns francs. Ussa cuntegn el mo pli las investiziuns las pli urgentas. Las investiziuns nettas els onns 2010 entochen 2014 muntan a frs. 7'348'000.-- (6'663'000.--) ni ella media frs. 1'469'600.-- (646'200.--) per onn. Sin fundament dalla situaziun finanziaria dalla vischnaunca eis ei denton necessari da far ulteriuras reducziuns. Finamira sto ei esser da contonscher in grad d'atgna finanziaziun en rama digl onn 2008.

Tier il quen current quintein nus da contonscher els proxims onns in quen ulivau. Quei ei mo pusseivel grazia al considerabel augment dallas entradas sil sector d'energia. Giavischeivel fuss denton ina sminuaziun dils deivets. Quei ei mo pusseivel cun reducir las investiziuns. Ils proxims tschun onns quintein nus cun in cash-flow da rodund 1.5 milliuns francs.

Grazia alla decisiun dalla cuminonza dil votants dils 24 da fevrer 2008 d'augmentar il pei dalla taglia sin l'entrada e la facultad, eis ei pusseivel da contonscher els proxims onns quens currents pli u meins ulivai. Quei ha per consequenza che nus vegnin a saver ulivar il deficit da bilanza e crear in bufatg agen capital. Pigl auter quintein nus cun in svilup moderau dallas entradas. Sin fundament dallas pitgiras finanzialas ed economicas actualas, ei ina prognosa seriosa e segira davart las entradas fiscalas denton greva.

Il plan da finanzas risguarda buca las consequenzas dalla nova ulivaziun da finanzas. Tenor nossas empremas apprezzaziuns duess quella refuorma finanziaria fundamentala denton tut en tut esser positiva per nies menaschi communal. Aschispert ch'il niev sistem ei approbaus, vegnin nus ad examinar da rudien las consequenzas. Quei sa succeder tier la proxima adattaziun dil plan da finanzas, damai ch'ei setracta d'ina planisaziun rullonta.

Finamiras politicas

Las finamiras politicas ein vegnidas definidas dil parlament communal sco suonda:

- ◆ > 12 % cumpart d'atgna finanziaziun
- ◆ > 70 % grad d'atgna finanziaziun
- ◆ < 3 % cumpart dalla grevezia da tscheins
- ◆ < 15 % cumpart contribuziun per survetsch da capital

Situaziun

	<i>finamiras</i>	2009 - 2014	2008 - 2013	2007 - 2012
Cumpart d'atgna finanziaziun	> 12 %	14.23%	11.26%	13.21 %
Grad d'atgna finanziaziun	> 70 %	106.85%	94.03%	186.93 %
Cumpart dalla grevezia per tscheins	< 3 %	4.52%	4.72 %	4.08 %
Cumpart contribuziun per survetsch da capital	< 15 %	18.53%	19.64%	20.21 %

Dallas quater finamiras politicas vegnan duas contonschidas. Quei ei buca cuntenteivel. Ins vegn perquei adina puspei a stuer sestentar da migliorar la situaziun.

Cunquei che nus savein actualmeim quintar cun fetg favoreivels tscheins pil capital, duess ei esser pusseivel da stabilisar ils cuosts, quei ton pli ch'ei sto vegnir fatg tuts sforzs da reducir ils deivets.

Sco ei seresulta dallas explicaziuns precedentas, havein nus saviu migliorar la situaziun finanziaria considerablamein. Tuttina san ils resultats previ buca cuntentar. Nus sperein denton d'esser sin ina buna via. A vesta dallas relaziuns economicas drova ei denton vinavon grondas stentas per migliorar las finanzas communalas.



Proposta

Sebasond sil plan da finanzas e cun las resalvas menziunadas

p r o p o n a

la suprastonza communalala al cussegl da vischnaunca da prender enconuschientscha:

- dil plan rullont da finanzas 2010 – 2014.

Suprastonza communalala Disentis/Mustér
Il president:  Dr. Dumeni Columberg
Il canzlist:  Andri Hendry

Disentis/Mustér, ils 12 d'uost 2009

- plan da finanzas (survesta, resumaziun dil quen current e cefras indicativas)
- program d'investiziun